



**REPUBLIKA E SHQIPËRISË
PROKURORIA E PËRGJITHSHME
PROKURORI I PËRGJITHSHËM**

Nr. 622/prot.
2

Tiranë më, 16.05.2024

UDHËZIM I PËRGJITHSHËM

Nr. 05, datë 16.05.2024

**PËR
REKOMANDIMET PRIORITARE NË LUFTËN KUNDËR KRIMINALITETIT
PËR VITIN 2024 NË PROKURORITË E JURIDIKSIONIT TË PËRGJITHSHËM**

Në mbështetje të neneve 148 dhe 148/b shkronja “b” të Kushtetutës së Republikës së Shqipërisë, neneve 38 pika 2 shkronjat “b” e “f”, 42 shkronjat “a”, “g” e “l”, 43, 45 pika 1, 46 pikat 1, 3 shkronja “c”, 48, 103 e vijues të ligjit nr. 97/2016, “Për organizimin dhe funksionimin e prokurorisë në Republikën e Shqipërisë”, të ndryshuar, nenet 5, 7 e vijues të ligjit nr. 25/2019 “Për organizimin dhe funksionimin e policisë gjyqësore”, i ndryshuar, dhe të vendimit të Këshillit të Ministrave nr. 243, datë 17.4.2024 “Për miratimin e rekomandimeve prioritare në luftën kundër kriminalitetit, për vitin 2024”¹

U D H Ë Z O J:

**KREU I
DISPOZITA TË PËRGJITHSHME**

**Neni 1
Qëllimi**

Qëllimi i këtij udhëzimi të përgjithshëm është unifikimi i ndjekjes dhe zbatimi i rekomandimeve prioritare të Këshillit të Ministrave në luftën kundër kriminalitetit për vitin 2024 (në vijim “rekomandime prioritare”) në kompetencë lëndore të prokurorive me juridiksion të përgjithshëm, pa cënuar pavarësinë e prokurorisë si organ që garanton

¹ Botuar në Fletoren Zyrtare, Viti: 2024 – Numri: 69, publikuar me 22 Prill 2024.

mbarëvajtjen, kontrollin e veprimtarisë së saj dhe respekton pavarësinë e brendshme të prokurorëve për hetimin dhe ndjekjen penale sipas ligjit.

Neni 2

Objekti

1. Objekt i këtij udhëzimi të përgjithshëm janë:

a) përcaktimi i masave administrative që duhet të merren për realizimin e përparësive që sigurojnë zbatimin e rekomandimeve prioritare në kompetencë të prokurorive me juridiksion të përgjithshëm;

b) përcaktimi i masave procedurale lidhur me mënyrën e vlerësimit, ndjekjes dhe zbatimit të rekomandimeve prioritare që çojnë në rritjen e efikasitetit në luftën kundër kriminalitetit për vitin 2024 sipas prioriteteve të rekomanduara dhe kompetencës lëndore në ushtrimin e funksioneve nga drejtuesit e prokurorive, drejtuesit e seksioneve dhe prokurorët;

Neni 3

Përkufizime

Në këtë udhëzim, termat/emërtimet kanë kuptimin, si më poshtë:

1. “Rekomandime prioritare” janë rekomandimet prioritare të miratuara nga Këshilli i Ministrave për luftën kundër kriminalitetit që i përcillen Prokurorit të Përgjithshëm nëpërmjet Ministrit të Drejtësisë, mbi kërkesën e të cilit, jo më pak se dy herë në vit, informohet mbi zbatimin e tyre.

2. “Drejtime të rekomanduara” janë drejtimet kryesore të rekomandimeve prioritare për vitin 2024: -garantimi i pavarësisë së prokurorit, -lufta kundër korrupsionit dhe krimit të organizuar, -garantimi i mbrojtjes së të drejtave të njeriut, dhe - nxitja e bashkëpunimit ndër-institucional brenda dhe jashtë vendit.

3. “Vepra penale prioritare të rekomanduara” janë veprat penale dhe/ose grupvepra penale të përfshira në drejtimet përkatëse të rekomanduara dhe/ose ato të cituara në rekomandimet prioritare dhe/ose në këtë udhëzim: veprat penale kundër korrupsionit, veprat penale në fushën e narkotikëve, krimet e rënda, trafikët, terrorizmi dhe veprat penale që çënojnë sigurinë kombëtare, pastrimi i parave, krimi kibernetik, veprat penale kundër mjedisit, krimi në familje dhe dhuna ndaj grave, veprat me natyrë gjinore, seksuale, diskriminuese, keqtrajtimit, shfrytëzimit e trafikimit të të miturve, vepra penale në fushën e taksave dhe tatimeve, krimet financiare.

KREU II

MASAT ADMINISTRATIVE

Neni 4

Masat administrative në Prokurorinë e Përgjithshme

1. Drejtoria e Koordinimit Institucional në Prokurorinë e Përgjithshme, brenda 15 ditëve nga administrimi i rekomandimeve prioritare, përgatit planin e veprimit për vlerësimin dhe

ndjekjen e masave dhe/ose aktiviteteve në afatet e përcaktuara, për zbatimin e rekomandimeve prioritare në prokuroritë e juridiksionit të përgjithshëm dhe në strukturat përkatëse të Prokurorisë së Përgjithshme.

2. Plani i veprimit miratohet nga Prokurori i Përgjithshëm, pas diskutimit dhe tërheqjes së mendimit në mbledhjen e prokurorëve të Prokurorisë së Përgjithshme, plan i cili, bashkë me rekomandimet prioritare, i dërgohet drejtuesve të prokurorive të juridiksionit të përgjithshëm.

3. Drejtuesit e strukturave në Prokurorinë e Përgjithshme garantojnë:

a) marrjen e masave nga strukturat përkatëse, si për rishikimin e sistemit elektronik të ndarjes së çështjeve në prokurori, me qëllim arritjen e funksionimit të plotë të tij, ashtu dhe për mbikëqyrjen teknike dhe administrative nëpërmjet kërkesave për informacion lidhur me mënyrën e disponimit për hedhjen e shortit elektronik nëpërmjet sistemit CAMS në të gjitha fazat e procedimit penal, si dhe kontrolli i vazhdueshëm mbi hedhjen dhe administrimin e këtyre të dhënave;

b) vijimin e bashkëpunimit nga struktura përkatëse me agjencitë ligjzbatuese rajonale dhe ndërkombëtare në funksion të efektivitetit të hetimeve për veprat penale prioritare të rekomanduara, veçanërisht ato që lidhen me korrupsionin, trafikimin e narkotikëve, pastrimit të parave, trafikimin e qenieve njerëzore, veprat penale kundër mjedisit, krimet kibernetike etj;

c) marrjen e masave për përmirësimin dhe përditësimin e sistemit elektronik e-tracking PRESTO si për vënien në efikasitet sa më të plotë, ashtu dhe për përfundimin e të dhënave statistikore, sipas një baze të të dhënave të qëndrueshme e të besueshme;

ç) përmirësimin e koordinimit institucional dhe ndërinstitutional me institucionet dhe agjencitë e tjera në lidhje me raportimet në zbatim të rekomandimeve të BE-së në kuadrin e integritetit evropian të vendit;

d) marrjen e masave për rritjen më tej të efikasitetit në bashkëpunimin ndërinstitutional për përmbushjen e rekomandimeve të Moneyval-it dhe zbatimin të udhëzimit të përgjithshëm nr.10/2020 “Për masat administrative dhe procedurale për rritjen e efektivitetit në luftën kundër pastrimit të parave e krimeve financiare dhe financimin e terrorizmit, dhe në hetimet pasurore në prokuroritë me juridiksion të përgjithshëm”, i ndryshuar;

dh) monitorimin e të dhënave në sistemin elektronik SVOPGJP për oficerët e policisë gjyqësore të seksioneve në prokurori, për numrin e veprimeve hetimore që kryejnë për secilin procedim penal apo procedim/hetim pasuror, me synim mbikëqyrjen e veprimtarisë së policisë gjyqësore për rritjen e efektivitetit dhe shpejtësisë së hetimeve.

Neni 5

Masat administrative në prokuroritë e juridiksionit të përgjithshëm

1. Drejtuesit e prokurorive të juridiksionit të përgjithshëm, brenda 5 ditëve nga mbërritja/regjistrimi i rekomandimeve prioritare, këtij udhëzimi të përgjithshëm dhe planit të veprimit për zbatimin e rekomandimeve, ua shpërndajnë për njohje dhe vlerësim prokurorëve dhe organizojnë mbledhjen e tyre për diskutimin dhe dhënien e mendimit lidhur me masat, aktivitetet dhe/ose për mënyrën e zbatimit tyre.

2. Drejtuesit e prokurorive, jo më vonë se 10 ditë nga mbledhja e prokurorëve, bazuar dhe në konkluzionet e mbledhjes, vlerësojnë nevojat për marrjen e masave administrative dhe procedurale, dhe në zbatim të kompetencave të parashikuara në ligj miratojnë një udhëzim të përgjithshëm për të lehtësuar zbatimin e këtij udhëzimi, dhe një plan veprimi në kuadrin e Planit të Veprimit të miratuar nga Prokurori Përgjithshëm, ku parashikojnë masat e nevojshme në përputhje me specifikat dhe gjendjen e prokurorisë që drejtojnë, përfshi nevojat për buxhet (nëse është i nevojshëm), për të siguruar zbatimin e rekomandimeve prioritare.

3. Plani i veprimit, krahas masave dhe aktiviteteve konkrete, përmban edhe tregues statistikorë (indikatorë) që do të plotësohen për të vlerësuar zbatimin e rekomandimeve prioritare, udhëzimeve të përgjithshme të Prokurorit të Përgjithshëm të nxjerrë në vijim të tyre, dhe udhëzimeve të përgjithshme të nxjerra nga vetë drejtuesi i prokurorisë.

4. Drejtuesit e prokurorisë, udhëzimin e përgjithshëm dhe planin e veprimit për zbatimin e rekomandimeve prioritare, ua njoftojnë pa vonesë, gjithë prokurorëve, oficerëve të policisë gjyqësore të seksionit dhe strukturave hetimore në shërbimet përkatëse të Policisë Gjyqësore, një kopje e dërgojnë në Prokurorinë e Përgjithshme, si dhe marrin masa e nevojshme organizative në drejtim të riorganizimit të brendshëm, për koordinimin dhe forcimin e kapaciteteve institucionale e profesionale, dhe ndjekin/mbikëqyrin në vazhdimësi ecurinë e zbatimit të tyre.

5. Drejtuesit e prokurorive, informojnë Prokurorinë e Përgjithshme (Drejtorinë e Koordinimit Institucional ose strukturën përkatëse), në mënyrë periodike çdo tre muaj, dhe sa herë kërkohet, për ecurinë e masave administrative e procedurale, angazhimet dhe progresin e arritur në zbatim të secilit prioritet të rekomanduar, të shoqëruara me tregues/indikator statistikorë të saktë e analitik dhe me shpjegime të qarta mbi angazhimet, arritjet dhe problematikat, dhe si ka ndikuar zbatimi i tyre mbi gjendjen e kriminalitetit në prioritetet e rekomanduara.

6. Në raportin vjetor të punës së prokurorisë, drejtuesit e prokurorive, gjithashtu, analizojnë në mënyrë të detajuar zbatimin e rekomandimeve prioritare në prokurorinë që drejtojnë, lidhur me arritjet, problematikat dhe si ka ndikuar zbatimi i tyre mbi gjendjen e kriminalitetit në fushat/drejtimet e rekomanduara.

KREU III **MASAT PROCEDURALE**

Neni 6

Masat procedurale të drejtuesit të prokurorisë

1. Drejtuesit e prokurorive, në zbatim të kompetencave të parashikuara në ligj vlerësojnë rekomandimet prioritare dhe nevojat për marrjen e masave procedurale në kryerjen e hetimeve dhe ushtrimin e ndjekjes penale në përshtatje me gjendjen e treguesve të kriminalitetit dhe problematikat e evidentuara në prokurorinë që drejtojnë, si dhe për të lehtësuar dhe garantuar zbatimin e udhëzimeve të përgjithshme të Prokurorit të Përgjithshëm

lidhur me masat procedurale, duke respektuar pavarësinë e institucionit dhe garantuar pavarësinë e prokurorëve, marrin masat si më poshtë:

a) nxjerrin udhëzime të përgjithshme që sigurojnë zbatimin e rekomandimeve prioritare dhe garantojnë e lehtësojnë zbatimin e udhëzimeve të përgjithshme të Prokurorit të Përgjithshëm;

b) nxjerrin udhëzime jo të detyrueshme për çështje konkrete, në momentin e caktimit të çështjes për ndjekje, përfshi rastet e regjistruara/filluara kryesisht, ose kur vlerësohet e nevojshme për mbarëvajtjen e ecurisë së procedimit, për veprat penale sipas kompetencës lëndore dhe në drejtimet prioritare të rekomanduara;

c) koordinojnë veprimtarinë me prokuroritë e tjera për çështje konkrete që lidhen me fushat/drejtimet prioritare të rekomanduara;

ç) kërkojnë informacion dhe verifikojnë ecurinë/përfundimin e procedimeve në hetimet paraprake ose në gjykim, në kuadrin e forcimit të mekanizmit të kontrollit dhe llogaridhënies, duke monitoruar sipas ligjit në veçanti, respektimin e afateve procedurale, rritjen e efektivitetit dhe plotëshmërisë së hetimeve, si dhe respektimin e të drejtave të subjekteve të procedimit penal dhe garantimin e procesit të rregullt ligjor përfshi shmangien e konfliktit të interesave apo shkaqeve të tjera të njëanshmërisë, për veprat penale prioritare të rekomanduara, duke garantuar paanshmërinë dhe shmangien e çdo lloj influence apo ndikimi ndaj prokurorit gjatë kryerjes së hetimeve në drejtimet prioritare të rekomanduara;

d) sigurojnë përditësimin me të dhëna të sistemeve elektronike (PRESTO, SVHOPGJP dhe e-tracking) dhe regjistrave proceduralë dhe administrative, si dhe mbikëqyrin/kontrolojnë në vazhdimësi saktësinë e të dhënave të regjistruara, administruara, dhe dërgimin në afat të të dhënave statistikore në Prokurorinë e Përgjithshme në përputhje me parashikimet ligjore dhe nënligjore;

dh) drejtojnë, organizojnë dhe mbikëqyrin shpërndarjen e çështjeve prokurorëve, duke garantuar zbatimin e kritereve të përcaktuara në ligj dhe udhëzimin e Prokurorit të Përgjithshëm, për të siguruar paanshmërinë dhe vijueshmërinë e hetimeve në rastet e zëvendësimit të prokurorëve;

2. Drejtuesit e prokurorive, gjithashtu, në kuadrin e masave që sigurojnë zbatimin e rekomandimeve prioritare, udhëzohen:

a) të luajnë rol aktiv, në marrjen dijeni për vepra penale nga burime të hapura², dhe jo vetëm, për fillimin kryesisht të procedimeve/hetimeve duke përfshirë rastet e ndikimit të paligjshëm të brendshëm apo të jashtëm në veprimtarinë e prokurorit;

² Koment: Burim i hapur është informacioni që është i disponueshëm publikisht, ku një nëngrup shumë i dukshëm i informacionit me burim të hapur është e ashtuquajtura "literaturë gri", që mund të përbëhet nga hulumtime, raporte teknike, ekonomike, "letra të bardha", dokumentacion konferencash, disertacione dhe teza, punime diskutimi, gazeta të lidhura me subjektet, apo informacione nga platformat e rrjeteve të mediave sociale, blogje, forume, platformat e ndarjes së fotove/videove, ku fokusohet në mesazhe të aksesueshme publikisht, përditësime statusesh, biseda, ndërveprime sociale, të dhëna dhe përmbajtje multimediale të tilla si imazhe dhe video, etj.. https://ëëë.unodc.org/documents/organized-crime/Laë-Enforcement/Criminal_Intelligence_for_Analysts.pdf;

<https://syntheticdrugs.unodc.org/syntheticdrugs/en/cybercrime/detectandrespond/investigation/OSINT.html>

Në këtë vështrim, burime të hapura mund të jenë: -publikime të shkruara, audio-vizive apo online në mediat apo rrjetet sociale; - raporte të institucioneve siç mund të jenë të publikuara nga KLSH-ja që përbajnë të dhëna për abuzime lidhur me veprimtari financiare apo me fonde publike, AIF- që përbajnë të dhëna për tipologji të dyshimta për pastrimin e parave, ose KQZ-ja që përbajnë të dhëna mbi shkeljet që përbëjnë krime zgjedhore para apo gjatë fushatës zgjedhore ose gjatë procesit zgjedhorë, etj.

b) të zhvillojnë mbledhje tematike me prokurorët e seksioneve, prokurorët e caktuar për ndjekjen e çështjeve dhe me oficerët e policisë gjyqësore të seksioneve apo të strukturave hetimore në shërbimet e Policisë së Gjyqësore, në kuadër të luftës kundër veprave penale prioritare të rekomanduara;

c) të nxjerrin urdhra për policinë gjyqësore që kanë në juridiksion lidhur me ushtrimin e funksioneve në kuadër të luftës kundër veprave penale prioritare të rekomanduara dhe ato të lidhura me to;

ç) të mbështesin punën e prokurorëve në ushtrimin e funksioneve nëpërmjet menaxhimit të duhur të burimeve njerëzore dhe logjistike në dispozicion, si dhe për krijimin e ambienteve të përshtatshme në prokurori në zbatim të Kodit të Drejtësisë Penale për të Mitur për të siguruar aksesin për persona me paafësi fizike dhe pritjen e publikut, sipas prioriteteve të rekomanduara;

d) të bashkërendojnë dhe koordinojnë me efikasitet veprimtarinë me prokuroritë e tjera kur kjo kërkohet në drejtimet/fushat ose për veprat penale prioritare të rekomanduara;

dh) të bashkëpunojnë në mënyrë efektive me institucionet shtetërore dhe ato ligjzbatuese me rol të posaçëm në luftën kundër veprave penale prioritare të rekomanduara, si dhe të organizojnë dhe zhvillojnë analiza të përbashkëta ndërinstitucionale sipas nevojave dhe jo më pak se çdo gjashtë muaj;

e) të koordinojnë dhe organizojnë trajnime të përbashkëta me agjencitë e zbatimit të ligjit të përfshira në luftën kundër veprave penale prioritare të rekomanduara, si dhe të lehtësojnë pjesëmarrjen e prokurorëve dhe oficerëve të policisë gjyqësore në trajnime të përbashkëta me agjencitë e tjera të zbatimit të ligjit në fushat dhe drejtimet e rekomanduara, veçanërisht në fushën e korrupsionit, krimeve të rënda, trafikëve, krimit financiar, krimit kibernetik, krimit mjedisor, veprave me natyrë gjinore, seksuale, diskriminuese, krimit në familje dhe dhunës në familje, keqtrajtimit, shfrytëzimit e trafikimit të të miturve, me fokus në format e reja të nxitura nga zhvillimet teknologjike dhe hetimin financiar paralel për krimet që gjenerojnë të ardhura.

Neni 7

Masat procedurale të drejtuesit të seksionit

Drejtuesit e seksioneve, në përputhje me kompetencat e parashikuara në ligj, vlerësojnë rekomandimet prioritare dhe nevojat për marrjen e masave procedurale në kryerjen e hetimeve dhe ushtrimin e ndjekjes penale për luftën ndaj kriminalitetit në kompetencë të seksionit që drejtojnë, si dhe për të garantuar zbatimin e udhëzimeve të përgjithshme dhe/ose udhëzimeve të nxjerra nga drejtuesi i prokurorisë që ndihmojnë dhe/ose lehtësojnë në rritjen e efikasitetit në veprimtarinë e seksionit dhe efektivitetin në luftën kundër kriminalitetit sipas prioriteteve të rekomanduara, dhe duke garantuar pavarësinë e prokurorëve, marrin masat si më poshtë:

a) nxjerrin udhëzime jo të detyrueshme për çështje konkrete, në momentin e caktimit të çështjes për ndjekje, përfshi rastet e regjistruara/filluara kryesisht, ose kur vlerësohet e nevojshme për mbarëvajtjen e ecurisë së procedimit dhe zbatimin e politikës penale për veprat penale prioritare të rekomanduara në kompetencë të seksionit;

b) janë aktiv në marrjen dijëni për vepra penale nga burime të hapura dhe në fillimin kryesisht të procedimeve/hetimeve për veprat penale prioritare të rekomanduara në kompetencë të seksionit që drejtojnë;

c) zhvillojnë mbledhje e diskutime tematike me prokurorët e seksionit, apo me oficerët e policisë gjyqësore të seksionit apo të strukturave hetimore në shërbimet e Policisë së Gjyqësore, në kuadër të luftës kundër veprave penale prioritare të rekomanduara;

ç) koordinojnë e bashkërendojnë me drejtuesin për rritjen e bashkëpunimit me institucionet shtetërore dhe ato ligjzbatuese me rol të posaçëm në luftën kundër veprave penale prioritare të rekomanduara në kompetencë të seksionit, si dhe për organizimin dhe zhvillimin e analizave të përbashkëta ndërinstucionale sipas nevojave.

Neni 8

Masat procedurale të prokurorit

1. Prokurorët, vlerësojnë në çdo rast masat në rekomandimet prioritare për luftën ndaj kriminalitetit në kompetencë lëndore të tyre dhe udhëzimet e përgjithshme të Prokurorit të Përgjithshëm dhe/ose udhëzimet e nxjerra nga drejtuesi i prokurorisë për të garantuar zbatimin e tyre, që ndihmojnë dhe/ose lehtësojnë në rritjen e efikasitetit dhe efektivitetit në luftën kundër kriminalitetit sipas prioriteteve të rekomanduara, dhe duke ruajtur pavarësinë nga çdo ndikim të paligjshëm në vendimarrjen e tyre, marrin masat procedurale të udhëzuara, si më poshtë:

a) të jenë aktiv gjatë hetimeve paraprake sipas ligjit, në funksion të shtimit të rasteve të hetimeve të filluara kryesisht për veprat penale prioritare të rekomanduara;

b) kryejnë hetime të plota e të gjithanshme për veprat penale dhe/ose ndaj subjekteve për veprat penale prioritare të rekomanduara, sipas kompetencës lëndore, në bashkërendim me Prokurorinë e Posaçme sipas ligjit dhe aktit të kordinimit ndërinstucional, duke rritur më tej treguesit/rastet e hetime proaktive efektive, përdorimin e metodave speciale të hetimit sipas ligjit, dhe hetimet financiare ose procedimet pasurore (*ndiq paranë*), si mjete për kërkimin e provave dhe për sekuestrimin/konfiskimin e pasurive/aseteve produkte të veprave penale ose veprimtarive kriminale prioritare të rekomanduara;

c) vlerësojnë dhe konsiderojnë ekzistencën e kushteve/kritereve ligjore për lidhjen e marrëveshjeve të bashkëpunimit në zbatim të nenit 37/a të Kodit të Procedurës Penale, duke synuar vënien përpara përgjegjësisë të çdo bashkëpunëtori në veprimtarinë kriminale, me synim për të parandaluar dhe riparuar dëmet e shkaktuara për veprat penale prioritare të rekomanduara;

ç) përdorin me efikasitet bazat e të dhënave të institucioneve ligjzbatuese të tjera ku prokuroria ka akses për rritjen e efektivitetit të hetimeve;

d) kryejnë analiza të përbashkëta me oficerët e policisë gjyqësore të seksioneve dhe të shërbimeve policore në strukturat hetimore përkatëse dhe/ose të agjencive ligjzbatuese, për rastet e referuara, në funksion të hetimit të specializuar, të shpejtë e të gjithanshëm, ndaj subjekteve dhe për veprat penale prioritare të rekomanduara;

dh) tregojnë kujdes të shtuar në ruajtjen e sekretit të hetimit dhe ndalimin e publikimit të akteve, duke konsideruar veçanërisht mundësinë e përfshirjes së punonjësve shtetërorë si bashkëpunëtorë të “jashtëm ose brendshëm” në këto vepra penale.

e) sigurojnë zbatimin e udhëzimeve të përgjithshme të Prokurorit të Përgjithshëm sipas fushave/drejtimeve prioritare të rekomanduara dhe akteve/marrëveshjeve të përbashkëta ndërinstytucionale të rekomanduara që unifikojnë dhe lehtësojnë koordinimin dhe bashkërendimin me strukturat/institucionet në fushat përkatëse të rekomanduara;

ë) kujdesen për zbatimin efektiv të të drejtave procedurale të të pandehurve/personave nën hetim apo të dyshuarve dhe sigurimin e drejtësisë miqësore për të miturin në konflikt me ligjin, si dhe garantojnë trajtimin me respekt për dinjitetin njerëzor dhe mbrojtjen nga ridëmtimi, riviktimizimi dhe viktimizimi i dytë, i viktimave të veprave penale gjatë ushtrimit të të drejtave të tyre në proces;

f) ndjekin një politikë penale efektive dhe efçente, me synim rritjen e efektivitetit në luftën kundër krimeve prioritare të rekomanduara, ashtu dhe për parandalimin e posaçëm dhe të përgjithshëm të veprave penale prioritare të rekomanduara, veçanërisht, duke analizuar, vlerësuar dhe arsyetuar në aktet/kërkesat/konkluzionet procedurale, si rrethanat e faktit të bazuara në prova, ashtu dhe kushtet/kriteret ligjore për:

i) ashpërsimin e kërkesave për caktimin e masave të sigurimit personal dhe për caktimin e llojit dhe masës së dënimit për veprat penale në fushën e narkotikëve dhe trafikeve, krimin në familje dhe dhunës ndaj grave- veçanërisht ndaj autorëve recidivistë të këtyre veprave, veprave me natyrë gjinore, seksuale dhe diskriminuese, si dhe për rastet e keqtrajtit, shfrytëzimit e trafikimit të fëmijëve;

ii) vijimin e aplikimit të masave alternative të shmangies ndaj të miturve në konflikt me ligjin dhe zbatimin e parashikimeve ligjore të KDPM, veçanërisht në drejtim të respektimit të garancive procedurale;

iii) sigurimin e zbatimit me kujdes të veçantë të garancive procedurale ndaj viktimave të mitur, për të mbrojtur efektivisht interesin më të lartë të të miturit, mirëqenien dhe jetën e tij private, parandalimin e riviktimizimit dhe viktimizimin e dytë të tij;

iv) aplikimin e dënimeve alternative në rastet e veprave penale dhe/ose autorëve me rrezikshmëri të ulët shoqërore, personave vulnerabël ose personave me probleme shëndetësore sipas rekomandimeve prioritare;

v) rritjen më tej të numrit të procedimeve, të pandehurve të dërguar për gjykim, dhe të dënuarve për veprat penale të pastrimit të parave, veçanërisht persona të tretë profesionistë dhe/ose subjekte raportuese (gatekeeper), ashtu dhe për rritjen më tej të hetimeve financiare e pasurore për identifikimin, sekuestrimin dhe/ose konfiskimin e pasurive produkte të veprimtarisë kriminale, ose vlerën ekuivalente, bazuar në prova/rrethana fakti objektive sipas ligjit, etj;

vi) rritjen e numrit të çështjeve të hetuara dhe dërguara për gjykim, për vepra penale në fushën e mjedisit, taksa tatimeve, krimin kibernetik duke siguruar bashkëpunimin dhe ekzpertizën e institucioneve referuese.

g) rritjen e numrit të kërkesave për gjykim të drejtpërdrejtë dhe për rritjen e numrit të kërkesave në zbatimin e instituteve procedurale penale të gjykimit me marrëveshje dhe

urdhrit penal, duke vlerësuar kushtet dhe kriteret ligjore dhe synimet prioritare të rekomanduara;

gj) rritjen dhe zhvillimin e kapaciteteve dhe aftësive profesionale, nëpërmjet pjesëmarrjes në trajnime apo në tryeza diskutimesh, si dhe trajnime të përbashkëta me oficerët e policisë gjyqësore të seksioneve dhe të strukturave hetimore në shërbimet, veçanërisht në fushën e korrupsionit, krimeve të rënda, trafikëve, krimit financiar, krimit kibernetik, krimit mjedisor, veprave me natyrë gjinore, seksuale, diskriminuese, krimit në familje dhe dhunës në familje, keqtrajtimit, shfrytëzimit e trafikimit të të miturve, me fokus në format e reja të nxitura nga zhvillimet teknologjike dhe hetimin financiar paralel për krimet që gjenerojnë të ardhura.

Neni 9

Masat në marrëdhënie me policinë gjyqësore

1. Prokurori vlerëson në çdo rast zbatimin e parimit të specializimit dhe urdhëron për kryerjen e hetimeve paraprake oficerët e policisë gjyqësore të strukturës hetimore përkatëse që ka referuar veprën penale në prokurori.

2. Në raste të veçanta, me kërkesë të arsyetuar të prokurorit për të garantuar objektivitetin e hetimit, drejtuesi i prokurorisë mund të urdhërojë për kryerjen e hetimeve oficerët e policisë gjyqësore të strukturave hetimore përkatëse të shërbimeve të tjera ose të seksioneve të policisë gjyqësore në prokurorinë që drejton.

3. Referuar natyrës dhe kompleksitetit të çështjes për vepra penale prioritare të rekomanduara, shtimin e rasteve të urdhëruara nga prokurori dhe/ose drejtuesi i prokurorisë për kryerjen e veprimeve hetimore të përbashkëta nga oficerë të policisë gjyqësore në strukturat hetimore të shërbimeve me ato të seksioneve në prokurori, sipas prioriteteve të rekomanduara.

4. Prokurorët ushtrojnë sistematikisht kontroll efektiv ndaj oficerëve të policisë gjyqësore në ecurinë e hetimit të procedimeve në ndjekje për ligjshmërinë, objektivitetin, plotëshmërinë dhe respektimin e afateve në veprimet hetimore të kryera dhe/ose vlefshmërinë e akteve procedurale të përfutuara, në drejtimet prioritare të rekomanduara.

5. Drejtuesi i prokurorisë, i cili drejton, bashkërendon dhe mbikëqyr veprimtarinë e policisë gjyqësore në juridiksionin e prokurorisë që drejton dhe/ose prokurori i çështjes konkrete, në rast evidentimi të akteve dhe sjelljeve që përbëjnë shkelje disiplinore sipas ligjit, përkatësisht kërkojnë dhe iniciojnë fillimin e procedimit disiplinor sipas ligjit.

KREU IV

PËRGJEGJËSIA DISIPLINORE, ZBATIMI, SHFUQIZIME, HYRJA NË FUQI DHE PUBLIKIMI

Neni 10

Shkeljet dhe përgjegjësia disiplinore

Shkelja e dispozitave ligjore referuese në këtë udhëzim të përgjithshëm dhe/ose moszbatimi i detyrimeve të përcaktuara në këtë udhëzim, mund të përbëjnë, shkelje

disiplinore sipas ligjit dhe/ose shkak për nisjen e verifikimeve nga Sektori i Monitorimit në Prokurorinë e Përgjithshme ndaj oficerit të policisë gjyqësore, prokurorit dhe/ose drejtuesit në prokuroritë me juridiksion të përgjithshëm, sipas ligjit.

Neni 11

Zbatimi dhe mbikëqyrja

1. Ky udhëzim i përgjithshëm është i detyrueshëm për zbatim nga prokurorët, drejtuesit e seksioneve, drejtuesit e prokurorive dhe oficerët e policisë gjyqësore në strukturat hetimore të shërbimeve dhe të seksioneve në prokuroritë e juridiksionit të përgjithshëm.

2. Me mbikëqyrjen e zbatimit të këtij udhëzimi ngarkohen drejtuesit e prokurorive dhe Drejtoria e Koordinimit Institucional në Prokurorinë e Përgjithshme, të cilët për ecurinë e zbatimit të këtij udhëzimi dhe rekomandimeve prioritare informojnë periodikisht Prokurorin e Përgjithshëm.

3. Drejtuesit e prokurorive mund të nxjerrin udhëzime të përgjithshme për lehtësimin e zbatimit të këtij udhëzimi të përgjithshëm.

Neni 12

Shfuqizime

Udhëzimi i përgjithshëm nr.02/2023 “Për rekomandimet prioritare të Këshillit të Ministrave në luftën kundër kriminalitetit për vitin 2023 në prokuroritë e juridiksionit të përgjithshëm”, shfuqizohet.

Neni 13

Hyrja në fuqi dhe publikimi

Ky udhëzim i përgjithshëm hyn në fuqi menjëherë dhe publikohet në faqen e internetit të Prokurorisë së Përgjithshme.

PROKUROR I PËRGJITHSHËM

OLSIAN ÇELA

